

七十二家集

梁元帝御製集卷之六

梁世祖孝元皇帝蕭繹著

表

薦鮑幾表

臣聞思皇多士仄陋所以明敷疇咨熙載髦俊
所以並作斯固殷殿初基拾龍淵之寶虞祠始
構獻鳳管之玉旌蒲出魯賁帛歸齊頌聲旣興
盛業斯在伏惟陛下則天緯地乘正馭才沙汰
八風澄明六合叶龜登夢之客日賁於丘園韋

穀投釣之臣相望於魏闕故以物無遺寶矣振
鷺有克庭之謳白駒罕空谷之詠洋洋濟濟無
得而稱者焉臣誠愧知才職非選舉竊以進賢
上賞蔽賢顯戮敢緣斯義用舉所知伏見鮑幾
門庭雍睦立身貞退博涉文史頗閑刀筆忠公
抗直出宰廉平雅志弘深安貧專靜解巾入仕
三十餘年自遊臣府一紀于茲前宰東邑實有
二魯之風近處南臺欲尊兩鮑之則伏揆天嚴
已當簡在脫蒙顯居良局登以清貫將齊毛玠

古人之服實同吳隱酌水之廉肯丁隈牧州陳
顧翟之好禮徐靖爲郡薦袁渙之篤學桓範驅
傳先舉管寧朱則剖符亦稱董直臣才非往哲
識愧前脩輕塵聽覽伏待斧鉞

薦顧協表

晉通六年有詔舉士湘東王表薦顧協
召拜通直散騎侍郎兼中書通事舍人
臣聞貢玉之士歸之潤山論珠之人出於枯岸
是以芻蕘之言擇於廊廟者也臣府兼記室參
軍吳郡顧協行稱閭里學兼文義服膺道素雅
量邃遠安貧專靜奉公抗直傍闕知己志不自
營年方六十室無妻子臣欲言於官人申其屈
滯協必苦執貞退立志難奪可謂東南之遺寶
矣伏惟陛下未明求衣思賢如渴爰發明詔各

舉所臣知識非許郭雖無知人之鑒若守固無言
懼貽蔽賢之咎昔孔愉表韓續之才庾亮薦翟
湯之德臣雖未齒二臣協實無慚兩士

請於州立學校表

臣聞公宮之南四術四教司樂成均六詩六律
韶濩既舞羽籥之道行焉黨塾茲備離經之志
辯焉故不升嵩霍豈識乾行之峻不臨溟渤安
知地載之厚洎乎秦焚金篆周亡玉鏡羣言爭
亂諸子相騰書則夏侯歐陽易則神輪道訓詩
乃齊魯毛韓傳稱鄒左張夾禮有曲臺王史之
異樂有龍德趙定之殊伏惟陛下撫五辰而建
五長播九德而導九州容城爲曆興景雲之瑞

身元引集 卷之六
伶倫吹律應黃鍾之琯撥亂反正經武也制禮
作樂緯文也若非六經庖厨百家異饌三墳爲
瑚璉五典爲笙簧豈能暴以秋暘紆就望之景
濯以江漢播垂天之澤

上忠臣傳表

資父事君寔曰嚴敬求忠出孝義兼臣子是以
冬溫夏清盡事君之節進思將美懷出奉之義
義軒改物殷周受命三能十亂九棘五臣靡不
夙夜在公忠爲令德若使縉雲得姓之子姬昌
魯衛之臣是知理合君親孝忠一體性與率由
因心致極臣連華霄漢憑暉日月三握再吐夙
奉紫庭之慈春詩秋禮早蒙丹宸之訓宣帝褒
德麟閣畫克國之形顯宗念功雲臺圖仲華之

象

遷荊州輪江州節表

周有掌節之職漢有符節之令所以子孫慷慨
忠肅勤王無絕終古有高前載臣自擁旄鶴塞
執茲龍節幸逢銀山自溢玉燭調年雖免茂弘
之譏竟微辛毗之勇

上穀克軍糧啓

臣聞金城千仞必資守粟革車千乘其在饋實
願武車綴旌列飛鴻之行陳奉辭受服拚摯獸
於貔虎賈達渠水雖曰難蹤梁習勸農竊知自
勉

啓

慶東耕啓

伏惟陛下敬授民時造幄籍圃漢之元鳳未足
捧羈晉之太始非堪扶轂但承明侍從卽事未
由周南留滯伏深戀仰

慶南郊啓

大裘而冕陶匏以質黃鍾既奏雲門斯舞樂諧
六變歌陳九德感天動神式展誠敬

上東宮古跡啓

師宜八分之巧元常三體之妙史籀李斯之篆
梁鵠曹喜之書莫不惣華桂宮盈蒲甲館竊以
鸞驚之奇旣聞之於索靖鷹峙之巧又顯之於
蔡邕是以游霧重雲傳敬禮之法鳥鰓魚頰表
揚泉之賦頗好六文多懸三禮尙方大篆旣其
半落柱下方書何曾髣髴空慕河間之聚書竟
微東平之獻表齊攸尺牘顧已缺然北海楷繇
終成難擬

上東宮薦石門侯啓

切以鳳鳴朝陽必資藍田之寶龍門點額亦俟
堂溪之珍是以紫玉見稱黃金爲貴文傳夢鳥
學重靈虵點漆凝脂事逾衛玠渾金璞玉才足
山濤昔翟湯隱逸見稱庾亮陳平器局被薦無
知以人廢言誠增悚懼進賢上賞伏待慈照

謝勅賜第啓

竊以漢賜五倫寔云清吏魏寵衛臻用旌庸直
未如靈充輪奐睢陽爽塏北連城闕有似甄侯
之舍東望市鄺榮深豫章之圃昔狼望未平冠
軍辭宅馬池猶隔雍丘讓邸臣慙霍曹遠志但
識君命無違再思庸陋九殞非荅

謝勅賜褥啓

昔漢后錫貂魏君送褥未有玄兔來王黃龍作
貢便覺蕭齊非遙挹婁無遠

謝上請蒙勅褒賞啓

臣薄領餘暇竊愛丹青雲臺之像終微髣髴宣
室之圖更難譏擬成蠅罕術畫馬疎才文非世
將恩深晉帝之賞跡愧景山寵踰魏皇之詔

謝賚車螯蛤蜊啓

車螯味高食部名陳物志蛤蜊聲重前論昆珍
若士企東海波臣西王母藥雀文始化燕羽猶
在體潤珠胎形隨月減

謝勅送齊王瑞像還啓

臣聞非晦非明法身凝寂有感有見渴仰赴幾
伏惟陛下百姓爲心宜觀衆覺十方皆是普照
王畿將使化行南國乃瞻西顧江水安流大川
利涉鮮雲變隼暫掩晨離甘雨霏微猶藏宿霧
高明可仰與天花而俱落清梵騰空雜塤篪以
相韻頂禮最勝敬謁法王瞻彼堵墻不足爲喻
直處針鋒弗云易擬臣身持淨戒心并法流接
足道周膜拜路左得未曾有喜躍克遍

謝賜功德淨饌啓

璚器自滿金鼎流味漿含都蔗味資石蜜

謝東宮賜白牙鑲管筆啓

春坊漆管曲降深恩北宮象牙猥蒙霑逮雕鐫
精巧似遼東之仙物圖寫奇麗笑蜀郡之儒生
故知嵇賦非工王銘未善昔伯喈致贈纔屬友
人葛龔所酬止聞通識豈若遠降鴻慈曲覃庸
陋方覺瑠璃無當隨珠過侈但有羨卜商無因
則削徒懷曹植恒願執鞭

謝東宮賚陸探微畫啓

工踰諸馬巧邁圖龍試映玉池卽看魚動還傍
金屏復疑蠅集史遷暫覩懸識留侯之貌漢帝
一瞻便見王嬙之像

謝東宮賜彈碁局啓

繹本慙游藝彌愧拂巾鳳時鷹揚信難議擬鳥
跂星懸曾何髣髴蓮花未易玉屑不工緣邊之
法庶遵細柳之陣徘徊之勢方希明月之樓子
桓有錫聞於邃古季緒蒙賜卽事可傳

謝東宮賚貂蟬啓

挹婁之毳曲降鴻恩麗水之玕復蒙殊獎東平
紫貂之賜非聞暖額中山黃金之錫豈曰附蟬
坐變仲尼之容增暉允南之貌

謝東宮賚寶枕啓

泰山之藥既使延齡長生之枕能令益壽黃金
可化豈直劉向之書陽燄含火方得葛洪之說
況復重安玳瑁獨勝瑰材方松非匹稱榴未擬

謝東宮賚花釵啓

臣亂九衢花舍四照田次之珥慙於寶葉王粲
之詠慙此采蓮九宮之璫豈直黃香之賦三珠
之釵敢高崔瑗之說况以麗玉澄暉遠過玳瑁
之飾精金曜首高踐翡翠之名

謝東宮賚辟邪子錦白襴等啓

伏承賚辟邪子錦白襴等者江波可濯豈藉成
都之水登高爲豔取映鳳皇之文至如鮮潔齊
紈聲高趙縠色方藍浦光譬靈山試以照花合
燭銀之狀將持比月亂合璧之暉

謝東宮賚麈尾錦帔團扇等啓

楊雄口誦本貴談端田蚡貌寢終於麗飾始興
之扇方斯非擬鄴中之錦匹此爲輕方願弘此
仁風旣動承華之氣服茲懷袖復比文若之香

爲妾弘夜姝謝東宮賁合心花釵啓

未得投壺先應含笑不因鸞鳳自能歌舞夜姝
昔住陽臺雖逢四照曾游澧浦慣識九衢未有
仍代爵釵還勝翠羽飾以南金裝茲麗玉脩靡
夫人本分章華之裏中山孺子獨荷春宮之恩
有志當熊無期投閣

爲妾夏玉豐謝東宮賚錦啓

舒將壺石堪來暮雨縈持結纜剩可蕩舟秦川
書字妙能八體鄴縣登高眞堪九日宋姬贈馬
未足爲榮馮媛乘車方茲非寵

謝東宮賚蒸栗牛啓

色似秘府之書毛類陳王之玉
驛角未奇瑩蹄非貴

謝東宮賚瓜啓

金榮始薦瓊蕊載珍味奪蔗漿甘如石蜜

謝晉安王賜馬啓

繹武媿仲都遂蒙大驪之錫儒謝春卿空頒名
馬之賚故以取方麟友自足龍媒不待景公婉
如齊畫無勞馬援翻等漢銅豈有滅沒黑龍連
翩白馬錢文見重津名取貴相彼騏驎猶深戀
主矧伊伏櫪彌結懷恩



梁元帝御製集卷之七

梁世祖孝元皇帝蕭繹著

書

與劉孝綽書

君屏居多暇差得肆意典墳吟詠情性比復希
數古人不以委約而能不伎癢且虞卿史遷由
斯而作想摛屬之興益富不少洛地紙貴京師
名動彼此一時何其盛也近在道務閒微得點
翰雖無紀行之作頗有懷舊之篇至此已來衆

諸屑役小生之詆恐取辱於廬江遮道之姦慮
興謀於從事方且褰帷自厲求瘼不休筆墨之
功曾何暇豫至於心乎愛矣未嘗有歆思樂惠
音清風靡聞譬夫夢想溫玉饑渴明珠雖愧未
隨猶爲好事新有所製想能示之勿等清慮徒
虛其請無由賞悉遣此代懷數路計行遲還芳
札

劉孝綽答湘東王書附

伏承白辭皇邑爰至荆臺未勞刺舉且摘膏

歷近雖預觀尺錦而不覩全玉昔臨淄詞賦
悉與揚脩未殫寶笥顧慙先哲渚宮舊俗朝
衣多故李固之薦二邢徐珍之奏七邑威懷
之道兼而有之當欲使金石流功耻用翰墨
垂迹雖乖知二偶達聖心爰自還居素里却
掃窮閭比楊倫之不出譬張華之杜門昔趙
卿窮愁肆言得失漢臣鬱志廣敘盛衰彼此
一時擬非其匹竊以文豹何辜以文爲罪由
此而談又何容易故韞翰吮墨多歷寒暑旣

闕子幼南山之歌又微敬通渭水之賦無以
自同獻笑少酬褒諷且才乖體物不擬作於
玄根事殊宿諾寧貽懼於朱亥顧已反躬載
懷累息但瞻言漢廣邈若天涯區區一心分
宵九逝殿下降情白屋存問相尋食樵懷音
矧伊人矣

荅晉安王敘南康王薨書

南康兄器宇冲貴風神英挺魏之中山徒聞遐
讓晉之扶風雖號師範用今方昔若吞夢雲及
尋陽私疾牽感神明殆不勝喪扶而後起猶冀
天道可期豈謂福善虛說且分違易久嘉會難
逢綢繆宮闕不過純綺之歲離羣作鎮動廻星
紀之曆志董雙鸞之集遽居四鳥之悲松茂柏
悅風昔歡忤芝焚蕙歎今用嗚咽

荅劉縮求述制旨義書

學山學海未臻其極爲龍爲光或從王事所賴
昔經陝服頗足良書憑几據梧靜供遊目枕中
之記卽用爲枕帷前之帙仍可爲帷對此自娛
敬以待命叩而必應已謝懸鐘波而無竭復垂
井養

與蕭挹書

方隆恒保清善握蘭雲閣解紱龍樓允膺妙選
良爲幸甚想同僚多士方駕連曹雅步南宮容
與自玩士衡已後惟在茲日唯昆與季文藻相
輝二陸三張豈獨擅美比暇日無事時復含毫
賦有賦詩別當相簡但衡巫峻極漢水悠長何
時把袂共披心腹

與學生書

吾聞斷玉爲器論乎知道惟山出泉譬乎從學
是以執射執御雖聖猶然爲弓爲箕不無以矣
抑又聞曰漢人流麥晉人聚螢安有挾冊讀書
不覺風雨以至朗月章奏不知燭火爲微所以
然者良有以夫可久可大莫過乎學求之於日
道在則尊

與劉智藏書

菩薩蕭法車置邨大士劉智藏侍者自林宗邁
反玄度言歸以結元禮之心彌益真長之歎故
以臨風望美對月懷賢有勞寤寐無忘與寢方
今玄冥在節歲聿云邁日似青緹雲浮紅蘂清
臺炭重北宮井溢想禪說爲娛稍符九次成誦
之功轉探三密山間芳杜自有松竹之娛巖穴
鳴琴非無薜蘿之致脩德之暇差足樂也昔韓
恂兩福求羊二仲鄭林騰名於馮翊周黨傳芳

於太原或有百鎰可捐千金非貴松子爲餐蒲
根是服未有高蹈真如歸宗法海梵王四鶴集
林籟而相鳴帝釋千馬經丘園而跼步有一於
此猶或稱奇兼而總之何其盛也故知南臨之
水已類呂梁之川北眺之山彌同武安之嶺豈
復還思潞浦尙想疆臺睠彼漢池載懷荒谷以
此相求心可知矣僕久厭塵邦本懷人外加以
服膺常住諷味了因彌用思齊每增求友常欲
登却月之嶺蔭偃蓋之松挹琬玉之源解蓮華

之劍藩維有限脫徙無由每坐向謂之牀恒應
管寧之榻夢匡山而太息想桓亭而延佇自雲
間之蒼江不極未因抵掌我勞如何想無金玉
數在郵示弱水難航猶致書於青鳥流川靡遠
佇芳音於赤玉鶴望還信以代萱蘇得志忘言
此寧多述法車叩頭叩頭

與蕭諮議等書

蓋聞圓光七尺上映真珠之雲面門五色旁臨
珊瑚之地化爲金案奪麗水之珍變同珂雪高
玄霜之彩豈不有機則感感而遂通有神則智
智而必斷故碧玉之樓升堂未易紫紉之殿入
室爲難必須五根之信以信爲首六度之檀以
檀爲上故能捨財從信去有卽空率斯而談良
可知矣竊以瑞像放光倏將旬日躡舞之深形
於寤寐杵躍之誠結於興寢稍覺十字之蒸噉

何曾之饌五鼎之味笑主偃之辭鼃羹麟脯空
聞其說羊酪猩脣曷足云也困于酒食未若過
中不餐螺蚶登俎豈及春蔬爲淨欲吾子三月
潔齋自寅至戌一巾而已自有米如玉銑鹽類
虎形雲夢之芹遼東之藻十斤之梨千樹之橘
青筍紫薑固栗霜棗適口克腸無索弗獲八功
德水並入法流四王俱至偕讓弘道同志爲友
豈不盛歟蕭繹疏

與武陵王紀書四首

紀爲益州刺史侯景陷臺城紀移告諸
州征鎮元帝時爲湘東王報紀以武帝
書問紀絕戎將發益鎮帝使胡
景至蜀書止之又別紙云

蜀中斗絕易動難安弟可鎮之我自當滅賊

又別紙

地擬孫劉各安境界情深魯衛書信恒通

又

皇帝敬問假黃鉞太尉武陵王自九黎侵軼三
苗寇擾天常喪亂獯醜憑陵皮劉象魏黍離王

室朕枕戈東望泣血西浮殞愛子於二方無諸
侯之八百身被屬甲手貫流矢俄而風樹之酷
萬恨始纏霜露之悲百憂繼集扣心飲膽志不
圖全直以宗社綴旒鯨鯢未翦嘗膽待旦龔行
天罰獨運四聰坐揮八柄雖復結壇待將褰帷
納士拒赤壁之兵無謀於魯肅燒烏巢之米不
訪於荀攸才智將殫金貝殆竭傍無寸助險阻
備嘗遂得斬長狄於駒門挫蚩尤於楓木怨耻
既雪天下無塵經營四方專資一力方與岳牧

同茲清靜隆暑炎赫弟比如何文武具僚當有
勞弊今遣散騎常侍光州刺史鄭安忠指宣往
懷

又

甚苦大智季月煩暑流金鑠石聚蚊成雷封狐
千里以茲玉體辛苦行陣乃眷西顧我勞如何
自獯醜憑陵羯胡叛渙吾年爲一日之長屬有
平亂之功膺此樂推事歸當璧儻遣使乎良所
遲也如曰不然於此投筆友于兄弟分形共氣

卷之四
兄肥弟瘦無復相代之期讓棗推梨長罷權倫
之日上沐靜拱聞四鳥之哀鳴宣室披圖嗟萬
始之

竟矣書不盡言

遺周弘直書

弘直兄弘正爲國子博士及侯景亂弘直爲衡陽內史元帝在江陵遣弘直書適有都信賢兄博士平安但京師搢紳無不附逆王克已爲家臣陸緬身克卒伍惟有周生確乎不叛言及西軍潺湲掩淚恒思吾至如望歲焉松楸後凋一人而已

與周弘正書

王僧辨之討侯景也弘正與弟弘讓自
板迎軍僧辨甚喜卽日啓帝帝手書與
弘正及至授黃門
侍郎直侍中省

焦醜逾亂寒暑亟離海內相識零落畧盡韓非
之智不免秦獄劉歆之學猶弊亡新音塵不嗣
每以耿灼常欲訪山東而尋子雲問關西而求
伯起遇有今信力附相聞遲比來卸慰其延佇

荅王僧辯獻橘書

世祖爲州刺史僧辯獲橘三十子共蒂以獻世祖荅之

昔文康獻橘十有二子用今方古彼有慙色今
景之覽惡旣稔凱歌之聲已及嘉瑞遠臻但增
歡慰

遺王僧辯論討侯景書

賊旣乘勝必將西下不勞遠擊但守巴丘以觀
待勞無慮不克

賜劉璠書

元帝承制授璠樹功將軍
鎮西府諮議叅軍賜書

邳禹文學尙或執戈葛洪書生且云破賊前脩
無遠屬望良深

責鮑泉書

泉美髮髯善舉止元帝承制累遷信州
刺史專征長沙久而不尅帝數泉二十
罪為書
責之

面如冠玉還疑木偶鬚似蝟毛徒勞繞涿

荅齊國餉雙馬書二首

名重桂條形同柳谷襄陽地穴近求未易滇池
水裏遠訪猶難價足龍媒聲齊驥子河精曜采
似伏波之鑄銅震象飛文笑東瀛之刻玉加以
控斯銀勒利此金銜鞍揭鏤衢光含兩月縕縈
紫縷色麗雙絲方嗤晉后恒乘鄭國之駟更鄙
曹君惟餉蜀王之馬

又

於戲馬之爲用遠矣大矣斯所以乾爲瘠馬震
爲馬足有是哉有是哉何則泮渙而馳可以及
日躊躇而蹠可以追風赤菟之騰聲的顙之濟
主陳王有勒羈之說班生有纏絆之談抑聞斯
美遠勞此費懷哉懷哉老生不云乎雖有拱壁
以先駟馬良用此道中心藏之何日忘之

梁孝元皇帝御製集卷之八

梁世祖孝元皇帝蕭繹著

序

簡文帝法寶聯璧序

竊以觀乎天文日月所以貞麗觀乎人文藻火
所以昭發况復玉毫朗照出天人之表金牒空
解生文章之外雖境智冥焉言語斯絕詠歌作
焉可畧談矣粵乃書稱湯誥篇陳夢說昔則王
畿居亳今則帝業維揚功施天下我之自出豈

與姚墟石紐譙城溫縣御龍居夏唐杜入周而
已哉皇帝垂衣負宸辨方正位車書之所會同
南暨交趾風雲之所沾被西漸流沙武實止戈
秉宜生之劍樂彰治定滅庖犧之瑟相兼二八
知微知彰將稱四七如魏如唐寧俟容成翠屋
之遊廣成石室之會故以宗心者忘相歸憑者
常樂昔轉輪護法南宮有金龍之瑞梵天請道
東朝開寶蓋之祥盡善盡美獨高皇代古者所
以出師入保冬羽秋籥實以周頌幼冲用資端

士漢盈末學取憑通議大傳之論孟侯小戴之
談司業山川珍異俟郊迎而可知帷幄後言籍
墾田而求驗以今方昔事則不然我副君業邁
宣尼道高啓筮之作聲超姬發寧假卞蘭之頌
譬衡華之峻極如渤澥之波瀾顯忠立孝行修
言道博施尚仁動微成務智察舞雩分封驗
爰初登仕明試以功德加三輔威行九流董師
虎據操鉞蟬冕津卿沈濟物仰平分之恩沂岱
邛岷民思後來之政陳蒼留反裘之化淮海高

墨幘之聲威漸黃支化行赤谷南通舜玉北平
堯柳朝鮮航海夜郎款塞然後體道方震雨施
雲行漢川戊申晉維庚午增暉前曜獨擅元貞
恩若春風惠如冬日履道爲興策賢成駟降意
韋編留神緇帙許商算術王國射譜南龜異說
東馳雜賦任良栾基美門式法箴興琴劍銘自
盤盂無不若指諸掌尋涇辨渭重以鳳豔風飛
鸞文颺豎織者入無倫大者含元氣韻調律呂
藻震玄黃豈俟取讚彥先詢聞雅主至於鹿園

龍宮與說遠命學徒親登講肆詞爲憲章
言成楷式往復王粲事軼魏儲酬答蔡謨道高
晉兩似懸鐘之應響猶衡鐸之待酌率邇者踵
武遐聽者風聲是使金堅秘法寶冥夕夢無懷
不滅華胥夜感自非建慧橋明智劍薰戒香沐
定水何以空積忽微歷賢劫而終現黍累廻斡
蘊珠藏而方傳加以大秦之籍非符八體康居
之篆有異六爻二乘始闢譬馬傳兔一體同歸
葉犀崇象潤業茲多見思平積本有凝邈了正

相因雖談假續不攝單影卽此後心還蹤初焰
俱宗出倒蓮華起乎淤泥盆會集藏明珠曜於
貧女性相當空般若無五時之說不生煩惱涅槃
爲萬德之宗無不酌其菁華撮其旨要採彼
玳鱗拾茲翠羽潤珠隨水抵玉崑山每至鶴關
且啓黃綺之傳朝集魚燈夕朗陳吳之徒晚侍
皆仰稟神規躬承睿旨爰錫嘉名謂之聯璧聯
含珠而可擬璧與月而方升以今歲次攝提星
在監德百法明門於茲總備千金不刊獨高斯

典合二百二十卷號曰法寶聯璧雖玉杯繁露
若倚兼葭金臺鑿楹似吞雲夢繹自伏櫪西河
攝官南國十迴鳳琯一奉龍光筆削未勤徒榮
上商之序稽古盛則又慚安國之製謹抄纂爵
位陳諸左方

內典碑銘集林序

夫法性空寂心行處斷感而遂通隨方接引故
鵬鵠曾謁馬死弘宣白林將謝青樹已列是宣
金牒方寄銀身自象教東流化行南國吳主至
誠歷七霄而光曜晉王畫像經五帝而彌新次
道孝伯嘉賓玄度斯數子者亦一代名人或修
理止於伽藍或歸心盡於談論錄頌所稱興公
而已夫披文相質博約溫潤吾聞斯語未見其
人班固碩學尚云讚頌相似陸機鉤深猶聞碑

賦如一唯伯喈作銘林宗無愧德祖能誦元常
善書一時之盛莫得係踵况般若玄淵真如妙
密觸言成累係境非真金石何書銘頌誰闢然
建塔紀功招提立寺或興造有由或誓願所記
故鐫之玄石傳諸不朽亦有息心應供是曰桑
門或謂智叢或稱印手高座擅名預師尹之席
道林見重陪飛龍之座裴眉廬阜之賢鄴中宛
鄧之哲昭哉史冊可得而詳故碑文之興斯焉
尚矣夫世代亟改論文之理非一時事推移屬

詞之體或異但繁則傷駢率則恨省存華則失
體從實則無味或引事雖博其意猶同或新意
雖奇無所倚約或首尾倫帖事似牽課或復博
涉體製不工能使豔而不華質而不野博而不
繁省而不率文而有質約而能潤事隨意轉理
逐言深所謂菁華無以間也予幼好雕蟲長而
彌篤遊心釋典寓目詞林頃常搜聚有懷著述
譬諸法海無讓波瀾亦等須彌歸同一色故不
擇高卑唯能是與儻未詳悉隨而足之名爲內

典碑銘集林合三十卷庶將來君子或裨觀見焉

職貢圖序

竊聞職方氏掌天下之圖四夷八蠻七閩九貉
其所由來久矣漢氏以來南僉旅距西域憑陵
剗金城開玉關絕夜郎討日逐覩犀甲則建朱
崖聞蒲萄則通大宛以德懷遠異乎是哉皇帝
君臨天下之四十載垂衣裳而賴兆民坐巖廊
而彰萬國梯山航海交臂屈膝占雲望日重譯
至焉自塞以西萬八千里路之夾尺有六寸高
山尋雲深谷絕景雪無冬夏與白雲而其色冰

無早晚與素石而俱貞踰空棄而歷昆吾度青丘而跨丹穴炎風弱水不革其心身熱頭痛不改其節故以明珠翠羽之珍細而弗有龍文汗血之驥卻而不乘尼丘乃聖猶有圖人之法晉帝君臨寔聞樂賢之象甘泉寫閼氏之形後宮玩卑于之圖臣以不佞推轂上游夷歌成章胡人遙集欵關蹶角沿泝荆門瞻其容貌訴其風俗如有來朝京輦不涉漢南別加訪採以廣聞見名爲職貢圖云爾

洞林序

蓋聞玄枵之野，鬼方難測；朱鳥之舍，神道莫知。而緹幔曉披，卽辨黃鍾之氣；靈臺夕望，便知玉井之色。復以談乎天者，雖絕名言之外；存乎我者，還居稱謂之中。余幼學星文，多歷歲稔；海中之書，畧皆尋究；巫咸之說，偏得研求。雖紫微迢遞，如觀掌握；青龍顯晦，易乎窺覽。笑門五將，亟經玩習；韓終六王，常所寶愛。至如周王白雉之筮，殷人飛燕之上；著名聚雪，非關地極之山。封

有密雲能擁西郊之氣爻通七聖世經三古山
陽王氏直解談玄河東郭生纔能射覆兼而兩
之竊自許矣

全德志序

老子言全德歸厚莊周云全德不刑呂覽稱全德之人故以全德創其名也此志陸大夫爲首伊人有學有辯不夭不貧寶劍在前鼓瑟從後連環炙輠雍容卒歲駟馬高車優游宴喜旣令公侯蹠掌復使要荒蹶角入室生光豈非盛矣若乃河宗九策事等神鈎陽雍雙壁理歸玄感南陽樊重高閣連雲北海公沙門人成市咨此八龍各傳一藝夾河兩郡家有萬石人生行樂

止足爲先但使樽酒不空坐客恒蒲寧與孟嘗
聞琴承曉淚下中山聽樂悲不自禁同年而語
也

卅陽尹傳序

傳曰大夫受郡漢書曰尹者正也及其用人實
難授受廣漢和顏接下子高自輔經術孫寶行
嚴霜之誅袁安留冬日之愛自二京版蕩五馬
南渡固乃上燭天文下應地理爾其地勢可得
而言東以赤山爲成臯南以長淮爲伊洛北以
鍾山爲華阜西以大江爲黃河旣變淮海爲神
州亦卽卅陽爲京尹雖得人之盛頗愧前賢而
眎遇之深多用宰輔皇上受圖負宸寶曆惟新

制禮以告成功作樂以彰治定豈直四三皇六
五帝孕夏陶周而已哉若夫位以德叙德以位
成每念泰蒞京河茲焉四載以入安石之門思
勤王之政坐真長之室想清談之風求瘼餘晨
頗多暇景今綴采英賢爲卅陽尹傳

懷舊志序

吾自北守琅臺東探禹穴觀濤廣陵面金湯之
設險方舟宛委眺玉笥之于霄臨水登山命儔
嘯侶中年承乏攝牧神州戚里英賢尚冠髦俊
陰真長之弱柳觀茂弘之舞鶴清酒繼進甘果
徐行長安郡公爲其延譽扶風長者刷其羽毛
於是駐伏熊廻文駟命鄒湛召王祥余顧而言
曰斯樂難常誠有之矣日月不居零露相半素
車白馬往矣不追春華秋實懷哉何已獨軫魂

交情深宿草故備書爵里陳懷舊焉

忠臣傳序

夫天地之大德曰生聖人之大寶曰位因生所以盡孝因位所以立忠事君事父資敬之理適異爲臣爲子率由之道斯一忠爲令德竊所景行且孝子烈女逸民咸有別傳至於忠臣曾無述製今將發篋陳書備加論討

孝德傳序

夫天經地義聖人不加原始要終莫踰孝道能使甘泉自涌鄰火不焚地出黃金天降神女感通之至良有可稱

懷張纘詩序

簡憲之爲人也不事王侯負才任氣見余則卑
且達夕不能已已懷夫人之德何日忘之